

Prolog Blagette 2023

Motto: «Zrugg zur Gmeindsversammlig»

Sit 50 Joor dien mir registriere
Duet dr Ywoonerroot unser Dorf regiere
Nach 50 Joor nämme mir uns d Miese
Und dien e Schlussbilanz jetz ziee

Mit viil Elan und mit viil Muet
Isch gschaartet dä Root ganz guet
Alli Rootsmiglieder, mir dängge jetz no draa
Hänn e Bezug zu unserem Dorf damals ghaa

Doch wies e so isch, in all däne Joore
Goot d Verbindig zum Dorf als wie mee verlore
Dä Root isch nümmi ortsverbunde
Dr Droot zur Bevölgerig isch verschwunde

Vo linggs bis rächts mien Dorfbarteie
Hütt chrampfhaft nach Kandidate schreie
Wo schlussäntlig nach langem Gschtoon
Sich uf e Waallische setze löön

Isch dä Root denn efang konstruiert
So stuunsch als Stimmbürger was passiert
Nach zwei, drei Sitzige s isch leider e soo
Laufe die erschte Rootsmiglieder scho drvoo

Mozione wärde diskutiert
Und laufend Leerlauf produziert
Nämmet numme s Bispil vom «Lindeblatz»
Sit siibe Joor schnuurt me über dä Blatz für d Chatz

Nach 50 Joor hän mir äntgültig gnue
Und mache dä Ywoonerroot-Lade jetz zue
An Stell vo däre Leerlaufbolitigg nundefaane
Sell wiider d Gmeindsversammlig aane

Uf dr diesjäärige Blagette cha me persee
Ä volli grossi Sänftuube gsee
Mir wänn in Zuekunft, diend das vernää
In dr Dorfbolitigg wiider dr Sänf drzue gää

Mit däne Studie wärs denn au verbii
Das verspräche mir euch grad glii
Denn mir hän längschtens usegfunde
Die sin Makulatur in dä Schublaade unde

Sogar d Barteie signalisiere mit vorghaltener Hand
D Yfierig vonere Gmeindsversammlig wär kei Schand
Ä Saal wär vorhande, d Infrastruktur parat
Also die Versammlig stoot vor em Start

In dr Grossufflag vom AWB, per see
Wirsch keini Geischerbaanfotene mee gsee
Vo Kandidate wo d Barteie dien portiere
Und mit Bolitversprächige gross plagiere

D Gmeindskommissione wärde wiider ygfiert
Dört wärde alli Sachgschäft diskutiirt
Die dien d Aaträg unter d Lupe nää
Und iire Sänf wenn nötig drzue gää

Mit scharfem Sänf in dr Dorfbolidigg
Und Salz in dr Suppe wär das nit schigg?
E Vollamt fürs Gmeindsbreesidium wünsche mir au
Egaal, sigs e Maa oder sigs e Frau

Und jetz, nach 50 Joor nundefaane
Muess d Gmeindsversammlig wiider aane

d Chrutstorze
Wildviertel-Clique Allschwil